



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 8

Gaza rara tatem kati arudaktsütsü: Kamala Harris

Ni iba season tatebangbuba asayatsü: Wriddhiman Saha



VOL. XXII ISSUE NO. 27 (ADOK 27) DIMAPUR SANGTENNÜ (TUESDAY) YIMPOKSÜI (NOVEMBER) 05, 20 ₹ 5.00

Meluri district akümba metetdaksür

Dimapur, November 4, 2024 (TYO): Nagaland Home Department-i Meluri sub-division nungi district jenjang nung ajungketba metetdaksüogo.

"District tasenba ya Phek district kübok Meluri sub-division telongtet asütsü. November 1, 2024 nü state Cabinet-i mulunga agizükba sülen iba sangdong agütsür" ta Chief Secretary Dr. J. Alam-i November 2 shidi nung shia lir.

Meluri nung Pochury Naga

nunger kin teimba ser alir aser Nagaland nung district 17 buba asütsü.

Tesüiba küm asem tsünda state sorkari district tasen pungu kümogo.

2021 küm People's Democratic Alliance (PDA) sorkari Kohima district nungi agiteta Tseminyu district aser Dimapur district nungi Chumoükedima o Niuland district ana aküm. Iba sülen 2022 nung Tuensang nungi Shamator district aküm.

Canada nung Hindu tekülem ki amakba khukhua aitsür: PM Modi

New Delhi, November 4, 2024 (Agencies): Ontario kübok Brampton nung Hindu tekülem ki amakba aitsür aser iba atema Canada sorkari temeten agütsüsüla ta Prime Minister Narendra Modi-i metetdaksüogo.

"Canada nung Hindu tekülem ki amakba khukhua aitsür. Canada nung Indian diplomats amokmerenba kasa aitsür. Ibalama ajanga India tashmait mekümdaktsütsü. Canada sorkari temeten agütsüsü aser ozünga mapa inyaktsü imlar" ta PM Modi-i ashi.

Canada nung Khalistani pusemertemi India nunger anema inyaksangshiba atema PM Modi-i tang mezünga atema ola adoker.

Tali bilemloka aoertem aser telungpurtemi ozünga alema mapa inyakba India sorkari aitsür. Justin Trudeau-i aniba Canada sorkari tekülem kitem kümzüka ayantsü mapa inyaktsü ayongzüker" ta Ministry of External Affairs (MEA)-i metetdaksüba sülen ghonda ishika lir PM Modi-i X nung iba

ya sangoktsü.

Brampton nung Khalistani wako amer lungkak aitertemi Hindu Sabha tekülem kidang adenshia aliba nisungtem den raratepba video kar social media nung prokshir.

Hindu Sabha Mandir kima nung nisungtem züktepba aser flagpoles agi züktepba video kar nung angur.

Iba tatalokba ya Canada Prime Minister Justin Trudeau-ia aitsüogo aser Canada nunger senso shiai pei tamangba yimsü sademsadema aser talenba kecha melii amangtsü temeten lir ta ashi.

"Brampton nung Hindu Sabha Mandir nung ozünga alema inyakba magizüker. Peel Regional Police-i mapang shitak nung nübortem kümzüka aser bushisüngdang asüba atema pelar" ta Trudeau-i ashi.

Khalistani kiralongrar Hardeep Singh Nijjar tepsetba nung Indian agents dena alitsü akok ta yaküm September ita Justin Trudeau-i ashiba sülen India o Canada tsünda tesentaktep mejungi küma lir.

Dimapur nung Deobarnü dokantem lapoktsü

Dimapur, November 4, 2024 (TYO): Dimapur nung benjung mongpu nung Deobarnü dokan ajak lapoktsü melar ta Dimapur Municipal Council (DMC)-i metetdaksüogo.

Deobar anüngdang 12:00 ako

sülen DMC telongtet nung dokantem lapoktsü melar. Iba ya local shishilembartem yaritsü aser nübortem tiptema shishiba atema lir ta Chief Executive Officer Thungchanbemo Tungoe-i ashi.

Manipur-Nagaland arrtsülen gari 100 shi anendena lir

Imphal, November 4, 2024 (Agencies): Guwahati nungi Dimapur adena National Highway 102 nung Imphal leni aoba khu gari 100 shi Mao gate nung anendena lir.

Naga People's Organization (NPO) aser tanga teloktemi Deobar nungi lungkak aitba akangshia liasü aser parnoki Senapati district headquarters ajanga garitem meyoker.

Manipur nung Arambai Tenggol züngsemtemi Naga Poumai nunger ana dak teka sangshiba atema temeten meshia NPO-i lungkak aiter.

October 31 nü Imphal West kübok Lamsang nung tena dak teka sangshi aser auyazüka bener ao.

Iba tatalokba dak sendakba nung police-i temulung melemi bilemer nisung ana puogo aser maneni bushisüngdang südar.

16th FC-i Nagaland semdangi arua lir, Sorkari Rs 70,000 cr memo agütsüsü



November 4, 2024 nü 16th Finance Commission nung Chairman Arivind Panagariya-i anir teshimtet telok ka Dimapur tonga aruba sülen Sovima nung Heirloom Naga Centre semdangdang agiba noksa ka angur.

Kohima, November 4, 2024 (TYO): 16th Finance Commission nungi züngsem pezü agi akümba telok ka tanü Nagaland semdangi arua lir aser parnok anogo asemnü mongzüktsü.

16th Finance Commission nung Chairman Arivind Panagariya-i anir Ajay Narayan Jha, Annie George Mathew aser Manoj Panda nunger den chairman Arivind kinungtsü Amita Panagariya, 16th FC secretary Ritvik Pandey, joint secretary Rahul Jain, joint director Raghvendra Singh, OSD Abhay Mittal, assistant director Anoop Kumar, PS to chairman Kumar Vivek aser PPS Meena Mahendra nunger densema arua lir.

Deputy Chief Minister Y Patton-i anir Advisor H Tovihoto Ayemi, Advisor Kazheto Kinimi, sorkar ketdangsurtem aser state Finance Commission ketdangsurtemi Dimapur airport nung parnok pelaa agizük.

Parnok Kohima-i atudang len tom nung Heirloom Naga Centre, Sovima semdanga liasü.

Nagaland nung anogo asemnü amongdang Commission-i asung Chief Minister, cabinet minister tem aser tongti ketdangsurtem den senden ka amentsü.

Iba senden nung state sorkari sector balala atema Rs 70,000 crore tema grants-in-aids meshiba memorandum ka agütsüsü renema lir.

Sector balala rongnung revenue deficit grants, rural & urban local bodies atema funds, education & health amala sector specific grants aser state-specific grants dena lir ta ketdangsur kati ashi.

Commission-isa trade, industries and commerce, rural & urban local bodies aser political parties den ajuruteptsü.

Bodbarnü parnoki Phek district nung Kapamodzu Peak semdangtsü aser tetsür entrepreneurs den ajurutepe empowerment oriented experiential tourism osang metetpelatsü.

Parnokisa National Highway nung anentsüh aluba tesemtem aerial survey agitsü aser November 7 nü Manipur-i apusoa

aotsü.

Commission nem tebilembatem lemsateptsü tashi agüja lir aser itemji April 1, 2026 nungi mapa küma tenzüktsü.

Commission-i Vertical Devolution, Horizontal Devolution, Grants-in-aid dak sendakba onüktem tongti süa inyaktsü. Parnoki October 31, 2025 tashi nung report agütsüsü imlar aser ibaji April 1, 2026 nungi mapa küma tenzüktsü.

Sixteenth Finance Commission (FC-XVI) ya December 31, 2023 nü tentet. Commission nung Chairman Dr. Arvind Panagariya-i anir züngsem pezü dena lir.

Finance Commission of India ya India President ajanga shimteter aser parnoki centre o state sorkartem tsünda Centre indang tax revenues koma lemsateptsü ta asüba shidangtsü tashi agütsür.

Finance Commission of India-isa state aser rural o urban local bodies nem grants agütsüba den national aser state disaster relief funds atema senotsü lemzüka shidanger.

Ao Senden-i V.K. Town-Doyang lenmang yanglutsü atakzüktsür

Dimapur, November 4, 2024 (TYO): Ao Senden-i Deputy Chief Minister, Planning & Transformation, National Highway dangi shidi ka ajanga NH 61 nung V.K. Town-Doyang lenmang yanglushitsü mapang atakzüktsüogo.

"V.K. Town-Doyang lenmang ya Zunheboto District Administration kübok lir aser iba lenmang ya Mokokchung District aser Kohima sendaktepba lenmang lir" ta Ao Senden Tir Marsanen Imsong aser Tongti Tezülur Imtipokyim nati shidi nung shia lir.

Iba lenmang majungba ajanga Mokokchung nung alirtemi

timtem jenti ajurur. Talisa Mokokchung-Mariani (NH 702D) aser Mokokchung-Anguri (NH 61) lenmangtem nung gari tilatem mesenzüteter ta parnokisa ashi.

"October 24, 2024 nü Ao Senden Sanen Luden senden nung bangjemtepba ama onoki nü dang anogo 30 tsünda garitem senzütetsüsa yanglushitsü mapang atakzüktsür aser iba two-lane project ya tekaratiba nung yanglutsü nenshir. Mapang agütsüba tsünda mapa meinyakra onoki kechi junger ta bilemdir inyaktsü" ta Ao Senden-i Deputy CM dang

shidi ajanga shiogo.

Iba lenmang ya Mokokchung aser Eastern District tem asoshi tongtipang lir. Ajisüaka iba National Highway nung garitem mesenzütetsüsa kümogo aser nübortem timtem jenti ajurur, ta parnokisa ashi.

Bangdak ketdangsurtemi zübazülema yutsüba aser pei ajangzüktsü bilema inyakba ajanga iba mapatong mapang shitak nung meinyaker. Anungji sorkari metokmeperi alitsüsa inyakerkem jangjatsüla aser parnok nem tebilemtsü khuret bendaktsüsüla ta Ao Senden-isa ayongzük.

"Tempest of Tranquility" sangro kaket saya



Capital College of Higher Education, Kohima nung Kurhungolu Ritse ajanga sangro bendena züluba "Tempest of Tranquility" kaket Hombarnü sayadang tangokba noksa nung angur.

Kohima, Yimpoksüi/Nov. 04 (TYO): Capitol College of Higher Education (CCHE), Kohima nung Department of English nung 3rd semester azünger Kurhungolu Ritse ajanga sangro bendena "Tempest of Tranquility" kaket Hombarnü Suohienuo Keyho, Principal of the Extension Training Centre (ETC), Phek, SIRD Nagaland ajanga college nung sentong ka agidang sayatsüogo.

Iba kaket ya CUE Academy Publications ajanga adok, kong cover design aser illustrations ya CCHE nung BA 5th semester azünger Moasunep Longchar-i yanglua liasü.

Keyho-i iba sentong nung jembidang Kurhungolu Ritse ajanga züluba kaket sayatsüba asoshi pelaba lemsatep aser lai tasü aitba ajanga la mulungjang nung bilema aliba sangro ajanga ashir, ta shia liasü.

Tajangshiba balala aser temulung nung bilembatem

yimya balala nung lemsatepsü sangro dak tashi balaka lir, ta ashi.

Ritse-i Tempest of Tranquility züluba ya tasü tait mera ka lir aser tesüngjem nung bendanga agütsür inyakba kuli asütsü, ta Keyho-i ashi.

Lai sentong nung adener tem danga pei takum nung sangro kanga metsünga-reta amshitsü ayongzük, kechiaser sangro ajanga nisung ka ajungmesor, ayongzük aser aneptsür, ta ashi.

Iba kaket zülur Kurhungolu Ritse-ia Tempest of Tranquility ya la nem shisa agütsür, lecturers aser college teyari ajanga zkülutet, ta ashi aser college ajanga la mulung nung bilemba lemsatepsü aser la mangdang asangsang akumtsü asoshi sapang agütsüba atema pelaba lemsatepa liasü.

Lai tezü tanga bilem aser sangro züluba anentsü bilem alia lar mentor Dr. Rukulu-i ajungmeso, ta kaket züluri ashi.

Iba kaket nüngja ya tereprangtsü süngjema aliba aser temulung taroktiba nung timtemba indang lir, ta ashi.

Sangro shia la indang tepela, tejashi, teimla aser mangdang lemsatepa lir, kong takum nung tepela aser tejashi ajangshibatem sayur.

Iba kaket azünger temi pei tajaba jangjatettsü imlar, ta lai ashi.

Iba kaket ya department indang Expressions of Creativity project nung shilem ka lir, ta Dr. Rukulu Kezo Puro, Head of the Department of English ajanga ashi, kong kaketshir temi züluba aser illustration workshops dena lir.

Dr. Zokho Venuh, Principal, CCHE ajanga tarur pela agizük aser Ritse takok asoshi tenüngsang agüja liasü.

Iba sentong ya Academic Dean Abeino Zashu lenisüba kübok agi, Tatongkala Lemtur, Dean of Students ajanga sarasadem aser Dzüthozo Ritse-i melepzüng o jembia liasü.

Nagaland State Disability Forum jashiba lemsatep

Dimapur, Yimpoksüi/Nov. 04 (TYO): Kohima nung October 24, 2024 nü sentong ka agidang iba sentong nung matamabensar shilem agütsüba atema Nagaland State Disability Forum (NSDF) ajanga tejashi lemsatepa liasü.

SDG Coordination Centre (SDGCC) ajanga adokba coffee table book Weaving Dreams - A Tribute to Inspiring Women of Nagaland sayaba sentong ya nisung ajaki shilem agitetba benjong ka asütsü liasü, saka Nagaland nung matamabensar temi mezüngshiba ang tali jangja sayu, ta NSDF ajanga ashi.

Tesüngmangtsüka iba sentong agiba tesem yagi kaket nung aliba tetsür ka, Diethono Nakhro, State Disability Commissioner oa shilem agütsüba mera agia meliasü. Sentong nung adentsü jaokaka aser iba kaket nung 'inspiring woman' ta tushia liaka, la otettsüba lenmang maliba yong lai shilem magitet, ta ashi.

Iba tatalokba yagi asen state nung matamabensar maneni bendanga amshiba indang tali jangja sayur, ta ashi.

Nakhro-ia la indang social media post nung iba ama timtem ya state nung tang mezüng ajuru masü ta shiogo.

"Iba ama timtem ya tang mezüng ajangshir masü saka asen lokti nung yimya ka ama lir aser kasaji matamabensai aliba nüburtemi ajangshir, ta

ashi. Ano tejashitstiji, iba sentong ya Sustainable Development Goals takok angütsü bendanga agütsüba SDG team kati ayongzükba lir, kong matamabensar densentsüba shia lir.

Iba ama sentong tulu nunga oa shilem agitettsüba lenmang magütsütetba yagi item inyakyim nung tasüngdangba arur.

Accessibility ya özüng balala aser talisa Rights of Persons with Disabilities Act (RPwD), 2016 kübok temeden agüja lir. Anungji iba tatalokba ya RPwD Act nung aibelenba tejangja lir, ta ashi.

Nagaland nung sorkar indang ki o jen, educational institutions aser sentong balala agiba tesemtem timba nung matamabensar oa shilem agütsüba lenmang lapokja mali.

Anungji iba tatalokba nung ajemdaker Nagaland nung nisung ajak asoshi inyaktüsü, ta ashi.

Tatok meshiba agi teperi masü, saka policy yangluba nungi tenzüka sentong balala yangluba nung ajak asoshi mera agütsüba, ta ashi.

Anungji NSDF ajanga Nagaland sorkar, SDG Coordination Centre aser establishments aser lokti tentet ajunga dang matamabensar züngdoka amshiba bentettsü asoshi tekeratiba nung mera agütsü ayongzük, ta NSDF sangdong ajanga ashi.

Noghuvi Achumi tepseter pua merenshitsüla: KATK, DSC

Dimapur, Yimpoksüi/Nov. 04 (TYO): Shevishe Village nungi Asür Khetovi Achumi'er jabaso aser Aghünato Town nung alir Noghuvi Achumi asüba atema kanga süngmanger aser jashir, shiba Integrated Mission Seminary, Khushiabill, Dimapur nung B Th. final year liasü, ta Kulolau Aghünato Tokukujomi Küqhakulu, KATK (Western Aghünato Area People's Union) sangdong ka ajanga ashi.

Asür Noghuvi Achumi ya Honibarnü outing adok aser Veterinary Colony, Burma Camp, Dimapur nung tetir kidang munga liasü. Aser nikongdang tashinung pa indang mobile phone switch off sür liasü aser

kinungertem rataa liasü.

Saka Deobarnep ang pa indang tasü mang ya blanket agi alepbanger Bethesda School anasa Walford area nung ngutet.

Kinunger temi FIR agütsüogo aser Post Mortem agiogo.

Tasü mapa inyaker pua tapet temerenshi magütsü tashi KATK süngjema malitsü, ta sangdong ajanga ashi.

Tai matek asür nem ochi obendang agütsütsü asoshi nüngdakba mera ajak agütsü özüng amshirtem dang ajangshir, ta KATK sangdong ajangasa ashi.

Maneni theology azünger lanur Noghuvi Sumi tepsetba

atema tejashi lemsateper, ta Dimapur Sumi Council (DSC) sangdong ka nung ashi.

Nisung tepsetba ya ajaki khukhua aitsütsü langa aliba mapa tamajung aser takum alitsü temeden nung aibelenba lir. Iba yagi timtem ajurur aliba kibong aser kin asoshi kisüng masü saka meimchir ajunga asoshi amadoktsü makokba tejashi bener arutsüba lir, ta ashi.

Iba ama mapa tamajung inyakba onoki khukhua aitsür aser ketdangsür dang kanga junga bushisüngdang aibelenem nem tapet temerenshi agütsütsü ayongzük, ta DSC ajanga ashi.



Office of the Development Commissioner (Handlooms) Ministry of Textiles, New Delhi ajanga sponsor süa Nagaland Handloom & Handicrafts Development Corporation (NHHDC) ajanga ayongzükba Handloom Exhibition sentong November 4, 2024 nü Prasiele Pienyu, Managing Director, NHHDC Ltd., Dimapur ajanga semzüktsü. Iba Expo ya November 17, 2024 tashi alitsü, kong Assam, Kashmir aser Nagaland kübok district balala nungi telok 60-i shilem agitar.

Peren nung Mini Hornbill Unity Festival atema mapa alem

Dimapur, Yimpoksüi/Nov. 04 (TYO): Peren district nung December 5-7, 2024 anogotem Mini Hornbill Unity Festival ayongzüktsü aliba dak sendakba nung shisadokdena aser mapa alemba senden ka November 4, 2024 nü Deputy Commissioner Office, Conference Hall nung mena liasü.

Iba senden nung Deputy Commissioner, Peren, Hiazu Meru-i iba Mini Hornbill Unity

Festival indang tongmelang agi rateta ashi, koba district nung tashi itshitsü aser telungjem tali kadaktsütsü nükjidong nung ayongzük.

Iba benjongmung sentong official ya Deputy Commissioner Office complex nung ayongzüktsü aser danga sentongtem ya Zero Point Beikingpuichak below D.C Office, Peren nung ayongzüktsü, ta Hiazu Meru-i

metetdaksü.

DC Office complex aser Zero Point Beikingpuichak nung aruju yanglutsü iba senden nung lemtet aser asemnü benjongmung mapang ayong anasa camping alitsü atema pangjema liasü.

Iba senden nung NZPO, Zeliangrong Baudi, Zeme Council, Liangmai Council, Kuki Inpi aser Rongmei Council nungi ketdangpurtem dena liasü.

Botsa Headquarters ulushitsü atema metetdaksür

Dimapur, Yimpoksüi/Nov. 04 (TYO): Botsa Headquarters ulushitsü atema ali agütsü asoshi Office of the Deputy Commissioner, Kohima ajanga sangdong ka metetdaksüogo.

Ali tasazük 66,167 square meters (16.35 acres shi) agütsü mesüra alizüktsü lir. Iba tesem ya Botsa, Kohima nung North tsütsü Stream/Road, South tsütsü Stream, East tsütsü Kehouzelie Rio aser West tsütsü Road/Water Canal den arütsüba lir.

Nagaland Land Requisition

Acquisition Act, 1965 indang Section 9 (2) kübok tashi agüja aliba nung ajemdaker Deputy Commissioner, Kohima ajanga kija mesüra telok balala dang iba ali agütsü aliba nung tai aputsü mesüra melenshitsü lira pei tebilemba lemsatepsü metetdaksüogo.

Tai aputsü mesüra temotongshitsü lira Deputy Commissioner indang office nem iba sangdong adoker anogo 30 tsüngta agütsütsü metetdaksür, ta ashi.



November 04, 2024 nū Australia kübok Brisbane yimti nung India External Affairs Minister, S Jaishankar-i Consulate General of India semzüksü dang tangokba noksa nung angur.

Opposition-i Lok Sabha Speaker dang Waqf bill atema mapang meshir

New Delhi, November 04 (Agencies): Joint Parliament Committee on Waqf (Amendment) Bill nung opposition party tem nungi MP temi Hombarnü shidi ka ajanga Lok Sabha Speaker, Om Birla dang iba bill dak sendakba nung tebilemba onüktem benoktsü atema mapang meshisemogo, ta osang ka ajanga metetdaksü.

Joint Parliamentary Committee (JPC) nung chairman, Jagdambika Pal-i, Waqf Board Amendment Bill dak sendakba nung tebilemba onüktem angadangsü atema JPC-i November 4-5 anogotem nunga stakeholders den senden aika amentsü, ta metetdaksü.

“Parliamentary Affairs Minister Kiren Rijiju-i Joint Parliamentary Committee atema bangzüng benokba

mapang nung pai iba ya JPC matsüngdang benokner ta ashi, ibaji ajanga dang onoki stakeholders, shisashirtem, Islamic shisashirtem, Supreme Court aser high courts nung taoba mapang judges aser lawyers aser minority organisations aika den iba onük nung tebilemba lemsateptetsü,” ta Pal-i metetdaksü.

Mongolbarnü committee-i Shreehari Borikar-i aniba Akhil Bhartiya Adhivakta Parishad, Anveshak-i aniba Gaurav Agarwal, Anjuman Shiatali Bohra, Dawoodi Community Senior Counsel, Dr Mohammad Hanif Ahmad (Associate Professor, AMU, Aligarh) aser Dr Imran Chudhary telok, Convener, kaketshirtem aser Madarsa Cell nungi lenirtem den Waqf (Amendment) Bill,

2024 onük nung tebilemba lemsateptetsü.

Waqf Act yanglushitsü aser waqf kiojentemji Muslim nunger ajak ajanzüksü asoshi amshitetsü atema JPC ya tenteta liasü.

Iba ozüng tajungtiba nung latetsü/yanlushitsü nükjidong nung JPC-i sorkar ketdangsertem, ozüng tsütsü mongintem, Waqf Board züngsemtem, states aser Union Territories ajak nungi Muslim nunger lenirtem den o lemtepa arudar.

Waqf kiojentem dak sendakba temzüng latetsü asohi Waqf Act, 1995 agizüka liasü, ajisüaka iba Act kübok waqf kiojentem tim mesüi amshiba, ochimashiba mesüra ozüng alema kiojen ambangyima agiba tatalokba aika lir.

Uttarakhand nung bus ka tsükokba lendong nung nisung 36 asü

Ramnagar, November 04 (Agencies): Hombarnü Uttarakhand state kübok Ramnagar nung Pauri-Almora arrtsülen Garwal Motors indang bus ka lungreni lua tsükokba lendong nung nisung 36 asü aser aika yiruogo.

Lendong atalokba tesem

nungjisa nisung 36 asü; iba bus nungji nisung 40 mena liasü.

Bus ji Garhwal nungi Kumaon-i aoba mapang nung Almora district nung lungreni metre 200 dak tali lua tsükokba sülen SDRF aser NDRF sepaitem iba tesem jagi oa kümzükba maparen inyak.

Chief Minister Pushkar Singh Dhami-i Secretary of Disaster Management, Kumaon Division Commissioner aser Almora District Magistrate den iba osang tongtepretepa sülen akokba tashi kümzükba maparen tekeraba nung inyaksü tuyua liasü.

EC-i Uttar Pradesh, Kerala aser Punjab nung by election atsülanger

New Delhi, November 04 (Agencies): Election Commission-i Uttar Pradesh, Kerala aser Punjab nung assembly by election November 13 nū agitsü aliba November 20 anogo tashi atsülangogo.

National aser state party aikati, benjung anogotem aika lir, anungji voters aikati election nung vote magütsütsü akok, anungji election anogo atsülangtsüla, ta EC dang mepishia liasü.

Congress party-i, Kerala

kübok Palakkad district nung November 13 nungi November 15 tashi aikati “Kalpathi Rastholsavam” benjung amongtsü, anungji voters aikati shilem magitetsü, ta EC nem metetdakja liasü.

Uttar Pradesh nung BJP, BSP aser RLD party temia, state nung Hindu nunger aikati Kartik Purnima benjung amongtsü atema anogo asempezü jelia aini apusor, anungji voters aikati shilem magitetsü, ta metetdakja liasü.

Punjab nung Congress party-i EC dang, November 15 nū Sri Guru Nanak Dev bilemteta 555buba Prakash Parv amongtsü aser November 13 nungi Akhand Path tenzüksü, ta metetdakja liasü.

Party balalai mepishiba nung ajemdaker Kerala nung assembly menden ka, Punjab nung pezü aser Uttar Pradesh nung menden 9 atema election ji joko November 20 nū ang agitsü. Ajisüaka vote azüngtsü anogobo (November 23) memelenshir.



November 04, 2024 nū Garhwa district nung Jharkhand Assembly election atema nüboyim sentong ka nung Ato kilonser, Narendra Modi adenba noksa nung angur.

DIMAPUR BRANCH Nyamo Lotha Road (Church Road) Dimapur- 797112, Nagaland, Email: dimapu@bankofbaroda.com

GARI TAYOKTSÜ LIR IMKONGSUNEP nem Bank of Baroda, Dimapur Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir. Iba gari alitsü janrartemi tsüngtong arua gari asadangsü aser gari indang osang tejangja agitsü atema ken o dak sendaka aliba ketdangsür den tongtepreteptetsü. Offer shiti den gari atema Earnest Money Deposit (EMD) ama sen 1,85,000/- (Rupees One Lakh Eighty Five Thousand Only) refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung "Quotation for purchase of vehicle No. NL-07/CC-6043" aser teküboklen shisema aliba gari tenüng zülur ketdangsür nem 06.12.2024 nū nikongtsütsü 4:00 ako tashi nungbo benoktsüla. Sealed quotations ya 06.12.2024 nū nikongtsütsü 5:00 ako nung Bank of Baroda, Dimapur Branch nung gari alitsü tebilemba aliba nisungtem matsüngdang lapoktsü. Bid takok ngua asüri quotation lapokba anogo nungi tenzükur anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesüra pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i latetja aliba jenjang dang nungi tekübokba nung mayoktsü. Ken o dak sendakba nung tashi agüja aliba ketdangsür ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtetsü.

Table with 3 columns: Sl.No., Vehicle Make and Description, Reserve Price. Row 1: ISUZU V CROSS 4WD MT Z (NL-07/CC-6043) Rs. 18,50,000/-

Date: 05.11.2024 Branch Head Place: Dimapur Bank of Baroda, Dimapur Branch

JOB VACANCY

A reputed News Channel of Dimapur, Nagaland requires smart, creative, lively, energetic, proactive, optimistic, sincere & jovial individuals with long term commitment for the under mentioned posts.

Applicants should preferably be experienced.

- VIDEO EDITOR / VIDEOGRAPHER (1 Post) Preferably with Graphic Designing Skills
GRAPHIC DESIGNER (1 Post)
NEWS REPORTER (1 Post)
Fluent in both Nagamese & English

Salary for the above posts is negotiable. Send resumes to - careernagaland@gmail.com



November 04, 2024 nū Haryana state kübok Kaithal nung gas cylinder ana apokba ajanga ki ka kanga mejungi raksar aliba noksa nung angur. Iba lendong nung tetsür ana asü aser nisung ana yiru.

Gujarat kübok Amreli nung tanur 4 gari nung tangu mesashiteti asü

Amreli, November 04 (Agencies): Hombarnü Gujarat kübok Amreli district tanur pezü alu kibur gari telung nung tanur pezü gari telung nung tangu mesashiteti süogo, ta police-i metetdaksü.

Amreli district kübok Randhiya yimdak alu nung aayanger kibong ka nungi tanur pezüji gari nung tangu mesashiteti asü. Aayanger kibongji Madhya Pradesh kübok Dhar nungi lir, ta Deputy Superintendent of Police, Chirag Desai-i metetdaksü.

“Hombarnep 7:30 ako meta tsürabur anaji Bharat Mandani'er alu nung aayangtsü atema apusoa liasü. Tsürabur

jagi par tanur tenetji kidang toktsür ao. Tanur tenet nungjagi tanur pezü alu kibur gari telung jagi atuba sülen gariji telung nungi shibang, aser parnok ajak tangu mesashiteti asü,” ta paisa metetdaksü.

Tanur pezüji arrshi küm 2 nungi 7 tsüngdapurtem liasü. Nikongdang par tsürabur ana den alu kiburji kidangi shilangba mapang nung gari telung nung tanur pezüji sür lia angu, ta paisa metetdaksü.

Amreli (taluka) police station nung ken o ka benokba sülen iba tatalokba bushisüngdang tenzükogogo, ta police ketdangserisa metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, NOVEMBER (YIMPOKSÜI) 05, 2024

Kibong aika akümba ya junger

Taküm 2024 küm asoshia tang ya lanurtem arogo nung temeshi kiyimba kulizüing agia kibong kümtepbä mapang lir, anungji yimti tulu nung alirtembo anogo nung kiyir benjong ana asem nung adentsüsa adoker. Aji oda, anogo shi amato kiyir benjong nung adentsüsa adokba agi asenoki aiben asenok kiyimba sentong nung adentsü asoshi jaokba ya nungdak maliba mapa ka nung asen nübo aser rongsen entokdaksütsü meinpronger amai bilema jembir. Ajisüaka, kodang asenoki asen kiyir benjong nung adentsü jaokba indang bilemdangdir, iba nungji tebilemdangtsü aser tepelatsü maparen aika sendaka lir. Aji oda, asenoki asenok temeshi kiyimba sentong daki jaokba ya maginer amai bilemra, küm nung asen yimtak, asen alidak mesüra asen arogo nung lanurtem rongnung shinga kibong maküm nunga koda (?) ta kanga aroka bilemdangtsü nungdaker. Ibaji dang masü saka asen alidak aser asen arogo nung lanurtem aika kibong akümer ser nung asenbo shingaia mejaokra koda (?) ta bilemdangtsübajia kanga tongtibang lir. Taküm nung nisung ajak atema kibong akümtsüba mapa ya tongtibangtiba mapa ka lir, anungji lanur ka asoshi peisasa pei taküm azüoka lia arur pei nuk dang ajungba aser pei mulung ajemba ka den tasü agi mepila tashi apuani kuma alitsü atema Tsüngrem tenüing nung nisung tsüngdang kiyimba kuli tenangzüktepbä agitsüba mapa ya temela masü. Iba jagi nisung aikati arogo majangi peisasa kibong akümer. Atangji, arogo ajanga kibong akümertem dang moamechia jangratema alitsü ta masü, alima asünungji arogo majangi kibong akümertemjiang, ashiko, takarba, tajungba aser teputepbä alitsü akok. Ajisüaka, tsüraburtem ajak arogo nung aser tanurtema ajak arogo nung ser nung arogo majangi kibong akümer teimba kümra, ibaji arogo tajemzükleni aoba tamaitüsü asütsü. Iba tangatetba nung kodangsa asenok dangi temeshi kiyimba kulizüing agidak sentep sentong nung adentsü jaokdir, pelashishia Tsüngrem tenüing sanga agizüktsüla. Asen alidak asen arogo nung lanurtem temeshi kiyimba kulizüing agitettsüsa adokbaji arogo nung ajak takok lir, anungji arogo nung ajak pelateptsüla, kechiyong item kibong tasen akümertem jagi arogo, yimten aser lokti nung Tsüngrem meteta shilem tajung agitsü. Item ajakji arogoi tanurtem aser lanurtem asoshi senotsü aser mapang teimba endoka anepalu tenzükba nungi adoktsü. Atangji, tanü asüing lanurtem temeshi kiyimba kulizüing agizüka arogo nung sentong agir külenang ano lokti chiyongdaksütsüba mapa ya taka tait toktepbä aser sayutepbä mapa aser sentong amai ka akümba ajanga, ashiko, lanurtem aika temeshi kiyimba kulizüing agia kibong kümnüseta mekümteti lia alitsü akok. Kasaji tsüraburtema aika kanga shisabolua alitsü. Iba tebilemtsü nung ya asenok tangatetba kati arua nüchi akümtsü nungdaker. Aji oda, asenok maka ser takar jilu ia kiyir benjong daki jaokertem nungi senotsü aruba agi menoktsü tebilemba nung asenoki sen aika endoka kibong tasen akümtsü küptetra, ibajibo kanga shisa makaba mapa ka asütsü aser aser kibong metenzükdangyongi raksar tenzükter asütsü. Kasaji, takartemia pei akaba shisangtsü atema menüingdabatem nungang senotsü teimba endoka kibong tasen kümra, ashiko, iba jagi kibong tasenji metemjentsü akok. Atangji, kiyir benjong sentongji pei mulungba nung yanglua akatsü, anungji arogoia aser yimteni ozüing agi alentsüa menüingdaker. Ajisüaka, takartemia sensakertem asoshi bilemja aser sensakertemia pei kibong tia angateta, kiyir benjong koma tulu aser tajung asütsü ta asübalen atsünga masü saka kibongji koma lia aotsü ta asübalenang süoki ia tebilemba bilema rongsen aser mapang kangabo lalushipong mesüi sarasadema kibong akümba sentong agira, ajiang lokti nung temelenshi tajung bener arutsür asütsü aser lanur kibong tasen aika topur junga tenzükter asütsü.

OLEMSABANG

Sarasadem tesepe koma asü nung tajungba süla

~ Limatula Longkumer.

(Yashi adok nungi...)

Yamai pei pei jurila fellowship tenzükta modaktsüi, arogoi tanela sempet akartem, aser sarasadem nung tejangrartem ya telong junga anitener amshitsüla. Parnok nem guidance peria agütsütsüla. Ashiko sarasadem tesepe lapoka aoba ya arogo nung sadema shilem magitetba ajanga asütsü akok. Pastoral ministry nung asentenshi nungdaker: Prayer centre tenzükta aoba ya arogo nung pastoral ministry nung tashi mait akümba tamaitüsü ka asütsü akok. Arogo ya nüburtem asoshi alir ta metetdi. Nüburtem tanela aser shi nung ajungmesotsü, ajungshitsü, metongshitsütsü, anepalutsü aser achayangtsü, aser Tsüngrem o nung tera yanga anitettsü asoshi alir. Mungdang aser local arogo anaprongla nung nüburtem, talisa maka maitertem, anepalutsüba ya tera senzükta aor amai nibo ajiteter. Tenzükter kwikadi pei santem timtem tia meteta lir? Asenok arogo nung toklang tenzükertem küm tepiyong program achayangba nung mapang teimba ka intoker. Ministry ya kanga mejungi institutionalized süatokogo. Hau, arogoi Institution ka lir, saka ibaji rigid institution kuma ora nübur taginübaji mabensatetsütsü akok. Arogo nung temzüngji nungdak tiptema aotsü asoshi saka ozüing nungji onsara ora ministry nung aiben tetsükdak adoker. A. P. Nirmal, India nung theologian nungtugu kadi India nung pastoral ministry indang yamai shia lir "pastors are functioning like pujaris, caretakers and chowkidars of the mission compound and church traditions and neglect the essence of pastoral ministry". Ochi shia dang ashir pastor aika kiboksem nung tashi mait, aser ibaji nüburtemi teti mepelai jembir. Pastor dangi sarasademjang ta arutsübaji aiben arendaka bilemer kechiaser parnokji kanga dang mazüing aliba nisungtem lir, saka prayer centre-ibo mapang mashi ka nung oteter. Asenoki metetdi, pastoral ministry ya 24 hours a day and 7 days a week. Tetezü, tenzükter kaji nübur asoshi teti azünga aliba, yarinüa aliba nübu ka asütsüla. Tanü tensa den putepa, nüburi aginüba ama ministry issue based nung yanglushitsüla. Tanü Mungdang staff-tema akhi ama arogo sema jajaba ajema kümogo, arogotemi aobaji teimba ka local arogoi sentong nung ajadang aoba lir. Yamai dang aonungbo Mungdang nung tenzükteri local arogo tia memeteti akümtsü akok. Mungdang nung tenzükertema nüburi aginütsüsa aser shisatsü agütsütetsüsa alitsüla. Iba denji Mungdang nung tenyaba mapa nung putu den apet inyaktsü asentenshi kanga nungdaka kümogo.

Sarasadem teloki arogoi inyakba mapa duplicate masütsüla: Tajungtibaji arogo kübok sarasadem tesepe alitsüla. Saka yamai dang independent süa aotsü asünungbo aser sarasademtsü asoshi lapokba süra iba sarasadem nungji nendak nendaka sarasadem tesepe-temi inyaktsüla. Arogo aser Mungdangi inyakba mapa kasaji meinyaktsüla. Angashiba agi centre aika nung Bible study, tekülem sentep aser training agtsür ta angazükter. Pei teinyaktsü arrtsü meteta inyaktsüla.

Arogo nung lenisüba inyakyim (leadership structure) melenshitsüla: Kechiba sarasadem tesepe aika akümer? Prayer centre nung kechiba tetsür teimba kibur asür? Counsellortem teimba ka lay people nungi adoker? Iba yagi arogo nung lenisüba aser arogo inyakyim sayur asür ta metetdi. Iba ya structural and leadership crisis den sentaktepa lir. Asenok Baptist tamendakdak kimongji, Priesthood of all believers lir. Saka iba ya noklang nung noklangbo asenoki tang tashi meinyaktetter. Arogo nung class telemsa – takar-sensaker, tular-tilar tebendang kanga lir.

Sensakertem lemteplemra nung anasai maruteter, tekülem nung shilem agitsü peria mangur. Tetsür-tebur tebendang inyakyim nung ulura lir. Ao arogo nung tetsürtem arogo inyakyim nung sadema aita mali. Kodsür tetsür ta bilemba mulungsentsü ano temulungjang nungi metugui lir. Prayer Centre nung free süa shilem agitsü mapang angur. Tang ABAM teinyakdak inyakyim nung ya women department aser Christian education dak alaka tetsürtem inyaktsü kokteta lenmang lapokja lir. Zulu nung tebur dang agitsü ta mali saka tanga department nungjibo tang tashi tebur dang inyaka arudaki. Anungji leadership structure nungji temelenshi tajung marura, ashiko tangbo prayer centre dang lapoka aorako, saka tarutsü nungbo arogo balala pakzükta aotsü ana nung lir. Tanü prayer centre ya arogo nung leadership crisis temaitüsü ka lir ta nibo bilemer. Iba tamaitüsü ya lendong ka ta meteta arogoi meinyakra, tarutsü nung tebilemtsü adoktsü ta metetdi.

Olepszüing

Iba ocet nung sarasadem tesepe aser tang arogo teinyakdak yimya anaprongla repa zülüogo. Ibai asen lima nung tongtibang tebilemtsü ka lir ta metetdi. Ajak ajungtsü mechi ajaki külemi shisatsü agüja arogo aser sarasadem tesepe anaprongla yaritepa aotsü mapang tongogo. Süra tangatetep nung külemi Khristar tenzükba wadang bener aotsü. Anapronglai Tsüngrem mapa inyaker, nüburtem tajungtiba nung yaritsü meranger. Anungji sarasadem tesepe aser arogo tesentaktep tajung alitsü nungdaker.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Global Church Network (GCN)-i training hubs 200 lapokogo



October ita tomlen Global Church Network-i Fiji nung ayongzükba FINISH OCEANIA summit nung Khristan lenirtem telok ka tangokba noksa nung angur.

November 04, 2024: 2001 kum Missouri nung tsungsang kanga majungba anogo ka nung James O. Davis pa gari nung lia Kibubai pa dang pastor tem atema network ka tenzükang, ta jembia liasü.

Tanela Temeshi ajanga James Davis den jembiba sülen alima nung Kibubai tenyaba wadang tulutiba inyaksü asoshi pai Global Church Network (GCN) tenteta liasü.

Yisu Khristai Pa nütsüngtem dang alima kintem ajak dangi oang aser osangtajung lemsatepang, ta tuyua liasü, ajioda GCN-i 2030 kum tashi nungbo kin ajak den Khrista osangtajung lemsatepsü nükjidong yur inyaker.

Taruba kum ishika tsüngda nisung billion aika Khrista dangi anir arutsü atema James Davis-i mangdang yur inyaker. Pa den tangartemi alima nung aliba oshi ajak nung Laishiba adoktsü atema inyaker aser Tsüngrem tenzüksü atema lanurtem nem training agütsür.

Osangbener den jembidang Davis-i, "Ministry nung onok ajaki jembiba o kaji- iba nükjidong ataloktsü atema asenok ajak teinyaksü shilem lir. Iba nükjidongji Kibubai tenyaba wadang tulutiba lir; nükjidongji- ajaki Khrista osangtajung angashitsüla," ta ashi.

2017 kum Germany kübok Wittenberg nung aliba Castle

Church nung Martin Luther leper anasa FINISH 2030 movement tenzuka liasü. Iba mapang nungji Kibubai tenyaba wadang tulutiba renema inyaksü atema Khristan lenir 600-i tenanzükba agia liasü.

Kechiba iba alizüng atongtsü atema 2030 kum shim?, ta asüngdangba langzudang iba ministry tentetsang Davis-i, 2017 kum par medemer kati Martin Luther atema kum 500buba benjungba indang lemsatep aser 2030 kum Arogo tenzükur kum 2,000 ajungba indang lemsatepa liasü, ta metetdaksü.

Global Church Network-i alima nung Arogo tenzükba sülen kum 2000 ajungba benjungmongji 2030 kum Jerusalem nung June 9 nung June 11 tashi amongtsü sentong renemdar, aser iba atemaji GCN-i Yirusalem nung International Convention Center mekazuka yuogo.

Takum October ita tomlen GCN-i Fiji kübok Suva nung FINISH OCEANIA summit ayongzuka liasü aser iba senden nungji asetkong linük 22 aser territory 10 nungi ministry lenir meyirjang aika aden. FINISH tetezü Find, Intercede, Network, Invest, Send aser Harvest lir.

Alima nung mission wadang kanga asakba tesem rongnung Oceania densema lir,

kechiyong item asetkong linüktem ya Pacific Ocean nung kanga prokshia lir, ta Davis-i metetdaksü.

2011 kum GCN tentetba mapang nungi pastor tem longjemtsü nükjidong nung parnoki Khristan ministry 2,750 aser Arogo 700,000 ayongsemogo. Iba sülen 2002 kum nungi parnok indang Global Church Divinity School nung tanela tsütsü lenir meyirjang aika nem training agütsüogo.

2030 kum tashi nungbo alima tesem ajaklen leadership training hubs 800 amenoktsü nükjidong yur GCN-i inyaker. Alima nung pastor tem agi anungba tebilemstü koktettsü nükjidong nung item training hubs nung minister million 1 nem training agütsütsü.

Balkans aser South Africa nunga item ama training hubs tasen aika amenokba densema continent 6 nung training hubs 200 amenokogo.

Mezüngbuba training hub ji 2012 kum Philippines yimtiba, Manila nung tenzuka liasü.

Item ama training hubs nung online ajanga theological training agütsür aser ibaji ajanga alima nung kanga tezulen aliba tesemtem nungia item training agiteter.

Ajisüaka United States nungbo linük tesem ajaklen Arogotemi dang item ama training ayongzuka katsür, ta Davis-i metetdaksü.

Canada nung Hindu nunger tekülem ki amakba India-i aitsür

New Delhi, Yimpoksüi/ November 04 (Agencies): India aser Canada na tsüngda tesendaktep mejungi lia ano maneni Canada kübok Brampton nung Hindu nunger tekülem ki ka amakba ajanga linük ana tsüngda tesendaktep tamajungba akümer.

Brampton nung India nungertem amakba sashia aitsüba den külemi India sorkari Canada nung India sensotem atema tebilemstü katsür, ta metetdaksü.

Ministry of External Affairs (MEA)-i sangdong ka ajanga, "Amongnü Brampton, Ontario nung separatist temi Hindu

Sabha tekülem ki amakbaji onoki sashia aitsür," ta metetdaksü.

Ministry of External Affairs otongdar, Randhir Jaiswal-i, "Onoki Canada sorkar dang tekülem kitem ajak kumzuka ayutsü atema inyaksü mepishir. Aibelenertem anema ken o akatsü onoki imlar. Canada nung India nungertem security atema onoki tebilemstü akar," ta metetdaksü.

Foreign ministry-isa, "Onok indang Consular officers-i India nungertem aser Canada senso naprongla nem kasa services agütsütsü, aser ibaji amokmeren mesüra amakba ajanga

menokdangtettsü," ta metetdaksü.

Amongnü Khalistani züngsemtemi Brampton nung aliba Hindu Sabha tekülem kidang Hindu nungertem amak. India anemertemi tekülem ki kikümbang kakkpoka tur tetsür-tanurtem densema India nungertem dak azükba videos aika online ajanga prokshio.

Iba tatalokba ya Canada Ato kilonser Justin Trudeau-ia aitsüogo.

Ita ka tejaklen India aser Canada na tsüngda tesendaktep ano tamajungba kuma linük anapronglai pepei linük nung ketdangsertem aika anentsüogo.

ANO GO ABEN TSÜNGREM DEN

Khrista sensakba, kü rongsen

"Kechiyong asen Kibuba Yisu Khrista takar liaka, Pa sensakba agi nenok takar kümdaktsütsü Pa nenok atema sensaker aküm" 2 Kor. 8:9.

Khrista metetba tetezü Tsüngrem taochi metetba. Khristaji Tsüngrem taochi ajunga lir. Taochiji Tsüngrem sempet. Khrista ajanga Tsüngrem sempettem ajak agütsür. Tsüngremer nükjidongji Pa purtem Pa rongsen agi süngdaktsütsüba aser aji Khrista asüba aser shia aruba ajanga takoktsü kümdaktsü.

Yisu Khrista shi akümba aser asüba jagi pa sensaker akümba sayur. Asenoki pa tejak mangu tashi Pa alimai marudang takar aliba asenoki mangatetsü. Bethlehem nung masodang, Pa tebu den koda tepela nung liasü asenoki asadangtsü makok. Aji saka Pai bendanga agütsü.

Daniel 9:26 nung ashir, Pa asütsü aser "Kecha makatsü". Tanela nung asenok sensaker liasü aser Tsüngrem nem agütsütsü kecha maka liasü. Pai asenok takar kümdaktsüner, Yisu Khrista taochi ajanga.

November 10 nüa reshikangshiba Khristantem atema sarasademtsü

November 04, 2024: Alima tesem balala nung Khristantem reshikangshiba jenjang ano tamajungba dang akümba mapang ka nung takum International Day of Prayer (IDOP) amonger.

Alima nung reshikangshi ajangshiba Khristantem atema International Day of Prayer ya November 3 aser November 10 anogo naprongla nung amonger.

Yakum October 7 nü Hamas teloki Israel amakba mapang nungi tenzuka Middle East nung tensa kanga mejungi kumogo aser Islam yimsü alia amangertemi Khrista sülen anidakertem anema ano tali asentenshir inyaker, ta Switzerland nung amenoka aliba aid agency ka nung ketdangser kati metetdaksü.

"October 7, 2023 anogo nungi tenzuka Middle East tesem ajaklen milak jangruogo aser kobi melii mashi mapang ka nung apoktsü. Saudi-Iran mesüra Israel-Arab lima nung yimtenren, loktiliba aser meimchir temeden nung ajemdaker tsükchirtem tsüngda yimjung yanglutsü kanga tasak kumogo. Ibaji ajanga reshikangshi tia nung aliba Khristan adianutem dak kanga mejungi kongshir aser linük atema tsükchirtem ama züngshir," ta paisa metetdaksü.

Middle East nung talisa Islam yimsü toktsür Khristan yimsü agizükertem kanga reshikangshi tenzükogo, ta paisa metetdaksü.

Israel sepaitemi Hamas anema raraba ajanga Egypt nunga Arogo züngsemtem tsüngda telemsa adok tenzükogo.

Africa nunga Islamic kiralongra ajanga Khristantem aika jenshia camp balala nung jenoka lir.

Tang alima tesem balala nung Khristan million 365-i reshikangshi balala ajangshidar, ta Khristan melungtet telok

Open Doors-i metetdaksü.

November ita nung mezüngbuba aser tanabuba Amongnü anogotem (November 3 aser November 10) nung reshikangshiba Khristantem atema sarasademtsütsü ayongzük. Anogo ana ya International Day of Prayer for the Persecuted Church anogomong lir.

Kum 20 tejaklen New York nung amenoka aliba World Evangelical Alliance-i mezüng iba anogomong ayongzuka liasü.

Ano Khristan melungtet telok Aid to the Church in Need (ACN)-i reshikangshi ajangshiba Khristantem nem teyari balala agüja arudar. Parnoki November 20 nü Red Wednesday amongtsü. Alima tesem balala nung Khristantem reshikangshiba osang proktsü nükjidong nung 2016 kum ACN-i Red Wednesday ya mezüng ayongzuka liasü. Iba anogo nung Arogotem, school tem aser nijatem dang süoshi sentsü temerem asemstü ayongzükur.

Tesüba kum ka kija nunga alima nung reshikangshi ajangshir Khristan million 5 bendenlokogo, ta Open Doors-i metetdaksü.

Tang alima nung Khristantem tamajungba reshikangshiba linükji North Korea lir (Open Doors' 2024 World Watch List), iba sülen Somalia, Libya, Eritrea, Yemen, Nigeria, Pakistan, Sudan, Iran, Afghanistan aser India linüktem lir.

U.S. Commission on International Religious Freedom (USCIRF)-i 2024 kum linük aika "countries of particular concern" (CPC) nung züngoktsü benokogo, aser item linüktem rongnung Afghanistan, Azerbaijan, Burma, China, Cuba, Eritrea, India, Iran, Nicaragua, Nigeria, North Korea, Pakistan, Russia, Saudi Arabia, Tajikistan, Turkmenistan aser Vietnam densema lir.

AO OSHI ANGAZÜKDAK:

TANÜ ANGAZÜKTSÜBA OJANG



Tarep

(adj) anasü, ana külemi (dual)

* Ni' kenu kena tsüda tarep saru agütsü.

Tarepzür

(n) süngjema malir, tajazü (restless)

* Tanur tarepzür reprangtsübo mapa tasak.

OLONG PAITEP # 6972

Grid for OLONG PAITEP # 6972 with numbers 1-16 in various cells.

TIPLÉN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 6971 TELANGZÜBA


TIPLÉN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Alima nung nüngtugu chocolatier aser pastry chef Amaury Guichon-i chocolate sculptures tajung yangluteta arur aser tawa tu pai Guinness World Record ka yanglutetogo. Guichon-i chocolate ajanga 66-inch tall aser 29.57-inch wide somomo (banana) ka yangluteta liasü. Las Vegas nung Guichon indang pastry academy nung iba ya yanglu. Tang tashi nung Guichon-i Guinness World Records tanabuba ngutetogo. Tesüba nung pai "largest chocolate sculpture of a balloon animal" otsü yangluteta liasü. Iba mapang pai chocolate agi azü (dog) ka yanglu aser iba sülen cocoa butter aser food-safe dye amshia pink colouring süa liasü.

Meghalaya sorkari Lakadong turmeric atema metetdaksür

Lakadong Turmeric Powder

"The Golden Goodness"



Guwahati, November 4, 2024

(Agencies): Meghalaya nung 'designated geographical regions' nung mesüi tangalen Lakadong turmeric yangluba noktanger ta sorkari metetdaksüogo.

Meghalaya nung mesüi tangalen Lakadong turmeric ta ser tiyazü yanglur ta Agriculture

Department-i bushitetba sülen iba ya metetdaksü.

Iba tetuyuba ya Meghalaya Agriculture and Farmers Welfare Department nung Commissioner & Secretary Vijay Kumar-i agütsü.

Lakadong turmeric nung high curcumin content lir aser

tanga dang nungi sentsü tenakremba lir. March 2024 nung Lakadong turmeric asoshi Geographical Indication (GI) tag agütsüogo.

GI tag ya 741 lir aser East o West Jaintia Hills districts nung dang yanglutsü akok ta lateta lir. Iba tag ya Jowai nung Lakadong Turmeric Cooperative Union Limited nem agütsü. GI tag angutsü atema Directorate of Horticulture, Department of Agriculture and Farmers Welfare ajanga yaritepa liasü.

GI tag anguba sülen designated areas nung masü tangalen tsünüba Lakadong turmeric aser Lakadong turmeric ta shia ayoktsü memelar. Registered proprietors aser authorised users-isa GI tag amshitsü akok.

Designated areas nung mesüi tangalen Lakadong turmeric yangluba atema Geographical Indications of Goods (Registration and Protection) Act 1999 kübok temerenshi lir.

Tripura Motha kaketshirtemi Governor dang facility tajungba meshir

Agartala, November 4, 2024

(Agencies): Tipra Motha Party nung kaketshir telok Tipra Indigenous Students Federation (TISF)-i Tripura Governor Indra Sena Reddy Nallu den ajurutep aser school o college tem nung infrastructure aser basic facilities tajungba agütsütsü takhangba agütsüogo.

TISF-i Governor Nallu dang shisaliok reju ajak nung

tetsürtemi hopta nung anaben Rignai (traditional cloth worn by Tripuri women) agidaktsütsü ayongzük.

Tripura nung college aser school teimba ka sema senzüdang study materials aliba takdang ka danga mangu. Iba ya kaketshirtem atema kanga tongtipang lir ta TISF-isa metetdaksü.

Kaketshirtem atema

restrooms peria mali, drinking water facilities shitak mali, menden tamentsü peria mali, electricity metokmeperi lir aser educational facilities nungdakba mali ta parnokisa Governor Nallu dang ashi.

Parnokisa Governor dang kaketshirtemi alangba ama schools aser colleges nung facilities tajungba agüjang ta ayongzükogo.

Manipur nung Naga lanur 2 dak teka sangshir ka apu

Imphal, November 4, 2024

(Agencies): Senapati district nung Poumai Naga nunger ana dak teka sangshiba atema Manipur Police-i temulung melemi bilemer ka puogo.

United Naga Council-i anir telok aikati iba ken o atema temeten meshir aser police-i aibelener tem aputsü atema merangdar.

Imphal West district police-i Arambai Tenggol (AT) activist ka apu. AT ya Manipur chuba aser Rajya Sabha MP

Leishemba Sanajaoba-i tentetba lir aser pa chairman lir.

Senapati district nung Naga nunger ana dak teka sangshidak shilem agi ta temulung melemi bilema police-i AT züngsem Khullem Sanjeep (Bhim, 30) apu. Deobarnü Imphal West district kübok Naoremthong DC road nung Khullem Sanjeep ya par kidang apu.

V Hrangao Blesson Poumai aser Dalou Poumai na dak teka sangshiba ken o dak sendakba

nung pa apu. Tenaprong ya Senapati district nung alir aser October 31, 2024 nü lendong ataloka liasü.

Tang tashi nung police-i iba ken o dak sendakba nung nisung ana tashi puogo.

October 31 nü police-i Lamsang tesem nung Kangleipak Communist Party (KCP) züngsem Senjam Suraj Meitei (25) apu. Iba ken o dak sendakba nung police-i maneni bushisüngdang südar.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA.

NO.DHFW-5/STIPEND/2019/6119-26/

Dated, Kohima the 1stNov' 2024.

NOTIFICATION

SUB:-SCHOLARSHIP SCHEME FOR MEDICAL, NURSING & PARAMEDICAL STUDENTS UNDER THE DEPARTMENT OF HEALTH & FAMILY WELFARE.

It is hereby informed to all the students undergoing medical, nursing and paramedical courses that, the Common Scholarship Portal for scholarship schemes under the Department of Health & Family Welfare will go live (active)w.e.f6th November 2024 till 6th December 2024.

The following points may be noted in this connection:- Applicants can access the said portal through the URL:https://scholarship.nagaland.gov.in The Department will accept application through the above cited Portal (online) only. Application submitted in Hardcopy to the Directorate will not be entertained and shall be considered as not applied.

- 1. Students & Institutions are instructed to go through the guidelines given in the portal before proceeding to fill up the online form.
2. Students selected through NEET/NSEE/State Departmental Examination only and undergoing the above mentioned courses shall be eligible to apply.
3. Students failing to complete their curriculum within the specified duration of the course (repeaters) shall not be entitled to additional stipend.
4. The portal shall be closed from 7thDecember 2024 and late application will not be entertained.
5. Students & Institutions are hereby advised to fill their online application well ahead of last date to avoid any last minute inconveniences.

(DR.E MOTSUTHUNG PATTON)

Principal Director Directorate of Health & Family Welfare Nagaland, Kohima.

Gaza rara tatem kati arudaktsütsü: Kamala Harris

East Lansing, Yimpoksüi/ Nov. 04 (Agencies): United States tir asoshi nübuyimba maparen tatemlen Democrat nungi Kamala Harris-i Gaza nung rara tatem kati arudaktsütsü nangzük.

Arab Americans aika aliba Michigan state, kong telok anaprong jenjang kasa lir, yangji arishi küm 60 tain Harris-i tang Gaza nung azüdokshiba ajanga jashia aliba nüburttem mesüzüktsü meranga Deobarnü jembia liasü. Gaza nung Palestine nung 43,000 dak tema tepsetogo aser yangji aliba nisung 2.3 million ajunga amai pei ki yutsür tesem balala nung jenshia lir.

“Gaza aser Lebanon nung civilian tem asüba aser ki o jen raksaba ya asadangra tensa kangasa mejungi arur. Tir ka ama ni Gaza nung rara temdaksütsü asoshi kü tashi ajak amshitsü, pua alirtem kidangi anir arutsü, Gaza nung timtemba temdaksütsü, Israel kumzüka ayutsü, Palestine nung kumzüka ayutsü aser par tashi, temeden aser pei sasa pei tia asoshi telemtetba agidaksütsü,” ta Harris-i Michigan nung Arab Americans 200,000 aliba East Lansing yimti nung ashi.

Lai Gaza rara komasür tatem kati arudaktsütsü sentong

yanglua ali, iba indangbo rasaa mashi, koba US-i yarir ta iba rara anemer temi ashir. Israel nem mitkar teyari tulutiba ya US-i agütsür.

Mongulbarnü election atema polls tenzüktsü ghonda 36 majung lia tang US vice president Harris aser la den toktepsang Republican telok nungi arishi küm 78 tain taoba tir Donald Trump nati nüburttem tatembang mesüzüktsü meranger.

US tir election asoshi nübuyimba mapang Israel-i Gaza aser Lebanon nung tang teraradak aliba indang ken o jembia aru, aser voters aikati US-i maneni Israel yariba aitsür.

Taoba küm October ita Hamas-i Israel linük telung nung aita amakba sülen Israel-i Gaza nung bomb pokloksü tenzükba sülen Tir Joe Biden ama Harris-ia Israel-i par tsükchir nungi kumzüka alitsü temeden lir ta shia aru.

Harris yagi tir inyaksü shimtetra Israel nem maneni nok-nü agütsütsü ta nangzüka lir, aser linük nung asadangra Trump tena tsüngta takoker tejangja mesayuteta aliba mapang tongtipang states tenet nungi vote timba angutsü nungdaker.

RealClearPolitics website ajanga asadanga openion polls

nung Trump ya shilem 0.1 agi dang temaba jenjang nung sayur aser polls pongu nung tena jenjang kasa sayur.

Michigan nungya Arab aser Muslim nung jenti lir aser Electoral College votes 15 lir aser iba state ya Harris-i takok angutsü asoshi kanga tongtipang lir. Taküm iba state den külemi Arizona, Georgia, Nevada, North Carolina, Pennsylvania aser Wisconsin ya swing states ama züngshir.

Michigan, Pennsylvania aser Wisconsin ya mapang ka Democratic telok timba aliba state tem ama züngshia liasü aser taküm item state ya kanga tongtipang lir. Item states dang “blue wall” ta ajar, saka 2016 küm Trump nem timba agütsü aser 2020 küm Biden-i nguteta liasü.

Trump-i Hokulbarnü Dearborn, Michigan semdanga liasü, koba Arab American community tesepe lir aser paia Middle East nung rara tembangdaksütsü nangzük saka komasür temdaksütsü aru.

Election Day matongdang America nung 78 million bo vote agütsüogo, aser yangji Republican dang tejangja Democrats 700,000 agi timba lir, ta University of Florida Election Lab ajanga ashir.

Indonesia nung Laki-Laki volcano pokteta atok; nisung 10 asü

Manila, Yimpoksüi/ November 4 (Agencies): Indonesia anütoklen volcano ishíben pokteta adokba sülen nisung 10 süogo aser iba ajanga temeket nung aliba yimtsüngtem mitsü agi sünga akümba den milong pokshiba agi ki aika rongtoktsüogo.

Mount Lewotobi Laki-Laki, koba alima penzürtemi kanga sapua semdanga Flores asetkong nung 1,703-metre (5,587-foot) twin volcano ka lir, iba ya Hombar anepdang züngia lia pokteta adokba sülen ketdangsürtemi iba tenem temeket nung aliba yimtsüngtem nungi nüburttem anintsüsa aküm.

Linük disaster mitigation agency BNPB otongdar Abdul Muhari-i osangbenertem den sensaksema mapang nisung asüba jangjashitsüogo aser ashiba agi, iba volcano pokteta adokba ajanga nisung 10,295 dak kongshio. Paisa, iba tesem nungi aninertem ano tang tashi tejangjabo memetet.

Linük volcanology agency-i, volcano indang alert jenjang ya tematiba jangjajungkettsüogo aser exclusion zone ya anasü agi timba kümja 7km (4.3-mile) radius tashi kümtsüogo.

Agency-i ashiba agi, iba volcano pokteta atokba sülen Wulanggintang district kübok Pululera, Nawokote, Hokeng Jaya, Klatano, Boru aser Boru Kedang yimtsüngtem nung nisung 10,000 shi dak kongshio.

Iba tesem nung alirtemi

tenem nungi milong pokteta adoka parnok ki dak kongshiba indang tetsübo lemsatepa liasü.

“Ni mejanga aliba mapang ajungbena kari anokshitsü ama yipden anaben anokshi. Iba sülen volcano pokteta adokogo ta ni yimdangi aru anungji ni kimai asema tugu,” ta hairdresser Hermanus Mite-i AFP news agency dang ashi.

“Ni mi adokba angu aser idangiisa jena ao. Ni meketa ajaklen long aser mitsü liasü. Kü indang salon nung mi jangrua ki telung nung aliba osset ajak rongtokogo,” ta arishi küm 32 tain Mite-i ashi.

AFP den lemsatepba footage nung volcano anasa kitem mitsü agi melem melema nembanger aliba aser tesem kar nungbo mi adoker aliba nguogo. Volcano anasa aliba AFP osangbener kati ashiba agi, yimtsüng pongu azüngtettsüogo aser iba ajanga nisung meyirejang aika tangalen tejenokdak bushitsüsa kümogo.

Süng agi yangluba ki kar rongtokogo aser tenem nungi long pokteta adokba ajanga alinung tapok patsüogo. Volcanology agency-i, tzünglu arutsü akok ta tekümdangtsü metetdaksüba den local tem dang mitsü nungi kümzüka alitsü atema mask asemtsü tetuyuba agütsüogo.

Kasa volcano ya Bresthostibarnüa pokteta adoka, mitsü meter 2,000 anüngleni yoka liasü.

Iba tesem ya January ita-a

aiben pokteta adokogo aser iba ajanga ketdangsürtemi nisung 2,000 shi anintsüsa aküm.

Indonesia ya Pacific “Ring of Fire” nung amenoka lir asünung aiben volcano pokteta adokba aser menonok anokba ajangshia arudar.

Taoba küm December ita linük kübok West Sumatra nung Mount Marapi pokteta adokba sülen tenemi atur nisung 24 asü. Asürtem ya timba university kaketshirtem liasü.

Maneni May ita-a tzünglu kanga sashia aruba sülen Marapi nungi volcanic material aponger aluba agi nisung 60 tashi asü aser ki aika aponger oa liasü. Kasa ita Sulawesi province nung Mount Ruang trokben dak tema pokteta adok aser iba ajanga nüburttem aika pei talidak ki toktsür jena aotsüsa aküm.

MULUNGNEN 0



ASO:
24-03-1931

ASÜ:
29-10-2024

Asür Tepdakyangla (Mangmetong)

Kodanga amatsü makokba temeim ojala, Tsüngremer yongsük ajangdanga arishia lir teti tatem maka dak alitsü asoshi aoba anogo nungi tanü tashi kija kibong aser lokti balala shirnokisa nübu, rongsen, shisatsü aser tamang sarasadem ajanga onok den yaritepa arudagi, nenok kija aser lokti shia dangi tsüngtong marutetaka iba sabang ajanga ajak dang pelaba lemsateper. Nenok temeim aser aria bilem mapa asoshi Tematiba Tsüngremi nenok nem lepa moajangni ta ozü tamang sarasadem.

Temeim Chirnur, Semchirsemur, Anükapang & Kinungertem

Mulungnen 0



Wt.Tialemla Jamir (Mongsenyimti)
Nov. 05, 1972 – Oct. 30, 2024.

Ozü temeim ojala, na onok asoshi anü sangwa ama teimla aser tashi angudak aser tashi itshidak liasü. La ya sarasadem aser tamang nung takang, temeim aketba aser ajemalu tetsü ka liasü. La temeim mapa tajung agi aika mulungjang peladaksüogo.

Onok mangyim jashi nung aliba mapang kija-kibong, kinunger-adianutem, kidang-kiyongertem, tembar-medemertem aser temeimertem shirnokisa onok dang aria bilema akokba maparen ajak nung yaritepogo, nenok ajak den onoki kanga pelaba lemsateper.

Ano, la manemi alidang Max Super Speciality Hospital, Saket, New Delhi nung inyaker Dr.Rayaz Ahmed (Haematologist, Medical Oncologist) aser pa den yaritper doctors, nurses aser staff ajak dang parnok anepalu aser teyari tajung asoshi onoki kanga pelaba metetdaksür.

Iba denji ano la nem azü tenla agütsürtem ajak dang nenok temeim mapa tulu asoshi onoki kanga pelaba shisemer. Ano talisa, onok timtem nung alidang len tajung sayua temeim mapatem agi yaritepba asoshi Delhi Ao Baptist Arogo danga pelaba metetdaksür. Onoki yangi nisung shia tenüngteta pelaba meshiteter, ajsüaka nenoki nübo, rongsen aser sarasadem agi onok dang meima yariba mapatem onoki kodanga mamadoktsü. Tulusang Tsüngremi nenok ajak talubosa moajangma.

“Onoki na teti menungra a bilemtettsü, Mummy.”

- Temeim kinungbo, Chirnur, Anük-apang & Semchirtem.

ALI
TAYOKTSÜ
LIR

OLD SHOWUBA NUNG ALI AYOKER
FOURLANE FLYOVER ANASA
For more details : 9863826159

GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA

Website: www.highereducation.nagaland.gov.in Email: dir.highedu@gmail.com
NO.HED/SCHO/2022-23/109

Kohima, dated the 1st Nov, 2024.

EXTENSION OF ONLINE SCHOLARSHIP APPLICATION IMPLEMENTED BY HIGHER EDUCATION.

This is to inform all Educational Institutions and Students that the State Merit & Research Scholarship Online applications implemented by the Directorate of Higher Education has been extended till the 10th of November, 2024. However, the timeline for online verification at the Institution level and hardcopy submission for students studying outside the State remains the same, i.e., 30th November, 2024.

Sd/-
(V. LOVITOLY SEMA), NCS
Ex-Officio Director
Higher Education
Nagaland : Kohima

Throttle Thrust VI gari asemtep tetoktepa sentong tembangogo



Dr. Watzulu Suzumeren Jamir den Throttle Thrust VI aser 2nd North-east championships 2023-2024 tetoktepa nung takokertem senpet agütsüba sentong agidang tangokba noksa nung angur. Mokochung, 04 November, 2024.

Mokochung, Yimpoksüi/November (TYO): Spearhead Motorsport Initiative-i ayongba VI buba Throttle Thrust sentong takok ma nung tembangogo. Taküm iba sentong Manemetong yim lushi nung agi. Senpet agütsüba sentong nung Development Authority of Nagaland, Chairman, Dr. Watzulu Suzumeren Jamir, tongti tesemdanger liasü.

2nd North-East Championship 2023-2024 tetoktepa nung telemsa ana liasü – SUV aser Car Category aser iba nung takokertemji;

SUV category:

1. Champion: Ana Solo
2. First runner-up: Lanusunep
3. Second runner-up:

4. Third runner-up: Andy Donald Mawrie
5. Fourth runners-up: Among Jamir

Car category:

1. Champion: Kima Jamir
2. First runner-up: Kamalesh Das & Lanusunep Jamir
3. Second runner-up: Ana Solo
4. Third runner-up: Andy Donald Mawrie
5. Fifth runner-up: Tomito

Throttle Thrust VI nung special categories asem liasü itemji – Stage I nung Fastest Timing, ibaji Thezieu Kire-i angu aser Stage II nung Fastest Timing-ji Kima Jamir aser Throttle Titans-i angu, Telok balala nungi shilem agir teimtibaji (most number of

participants) senpetji Adventure and Motorsport Association Mokochung (AMAM) nem agütsü AMAM nungi züngsem 8-i shilem agi.

Throttle Thrust VI tetoktepa shilem asemsü lemer agi aser takoker itemi liasü:

Below 1300 cc category:

Champion: Tsuktimongba
First runners up: Maputoshi
Second Runners up: Kima Jamir

SUV category:

Champion: Kamalesh Das
First runners up: Lanusunep
Second Runners up: Abemo Naga

Open category:

Champion: Tsuktimongba Jamir
First runners up: Kima Jamir
Second Runners Up: Thezieu Kire
Third Runners Up: David Rhakho.

'Ni iba season tatembangbuba asayatsü': Wriddhiman Saha

Yimpoksüi/November 4, 2024 (Agencies): Bengal nungi asayar Wriddhiman Saha-i, pa tang asaya aliba Ranji Trophy tembangba sülen asaya nungi anisüngzüksü, ta shiogo.

“Cricket asaya jangradema asaya aruba sülen iba season ya kü atema tatembangbuba season asütsü. Ni asaya nungi maneni tsüngda Bengal tenüng nungi tatesa ano khen Ranji Trophy asayatsü maongka anguba atema kanga pelar. Asenoki iba season ya teti bilemtetsüsa asayadi,” ta Shah-i X ajanga metetdaksü.

Wicketkeeper-batter ya India tenüng nungi Test asaya 40 aser T20I asaya 9 nung asayaogo. Iba den pa Indian Premier League (IPL) nunga Kolkata Knight Riders, Punjab Kings, Sunrisers Hyderabad aser Gujarat Titans amala club tem nungi asaya 170 nung asayaogo.

Temetetsü kaji, Saha tatemsabuba asaya club Gujarat Titans puri pa 2025 season atema meshimtsü telemteba agiogo. Pa den külemi club-i Mohammad Shami, David Miller, R. Sai Kishore aser Matthew Wade nung amala tongtibang asayatem toktsüogo.

Saha 2007 nungi 2022 tashi



Bengal tenüng nungi asaya aser küm ana Tripura nungi asaya liasü. Pa Cricket Association of Bengal (CAB) ketdangsür ka den mangatettep adokba sülen küm ana Tripura nungi asaya. Ketdangsür yagi Saha-i Ranji masayatsü asoshi kuli balala bener arua liasü ta shia pa aitsü. Pa taküm August ita ano Bengal team nung densेमogoo.

Ranji Trophy 2024-25 round pezübuba aser pongububa atema Bengal squad: Anustup Majumdar, Wriddhiman Saha, Sudip Chatterjee, Sudip Kr Gharami, Shahbaz Ahmed, Wriddhiman Chatterjee, Avilin Ghosh, Shuvam Dey, Shakir Habib Gandhi, Pradipta Pramanik, Aamir Gani, Ishan Porel, Suraj Sindhu Jaiswal, Md Kaif, Rohit Kumar, Rishav Vivek.

Capt N Kenguruse asayamung: Western Sumi & Dynamo FC nati takok angu



Tang Kohima nung asaya aliba 8buba Capt N Kenguruse, MVC Memorial Football Tournament nung nung Hombarnü asayatem asayaba mapang tangokba noksa nung angur.

Kohima, Yimpoksüi/November 4 (TYO): Tang asaya aliba 8buba Capt N Kenguruse, MVC Memorial Football Tournament nung Hombarnü Western Sumi Sports Association Niuland aser Dynamo FC Dimapur nati pei

tata asaya kokogo. Iba asayamung ya Indian Army aser Assam Rifles nati ayongzuka Indira Gandhi Stadium, Kohima nung tang tasayadak lir. Hombarnü mezüngbuba asaya nung Western Sumi SA-

i goal 2-1 agi Vanguard Academy Tseminyu kokogo.

Asaya nung mezüngbuba goal ya Western Sumi nungi asayar Kakhevi-i minute 10buba nung idaktsü, saka mapang tatsüka dang lir minute 26buba nung Khiti Kath-i Vanguard atema goal ka idakja goal kasasa aküm.

Iba sülen asaya tanabuba shilem nung asaya atemtsü lia Thulunso-i Western Sumi atema tanabuba goal idakja parnoki asaya koka liasü.

Hombarnü tanabuba asaya Dynamo FC Dimapur aser Viswemi FC Kohima na asayaba Dynamo FC-i goal 3-0 agi kokogo.

Asaya nung mezüngbuba goal ya Sunep-i minute 9buba nung idaktsü aser iba sülen Ato o Nyathang nati minute 64 aser 66buba nung goal kaka idakja parnoki iba asaya goal asem agi ayong ayonga koka liasü.

November 5 nü asayatem:

1. Sports Society Soyim FC, Mokochung vs Velocity Vipers FC Mon @ 10am
2. Halcyon United Phek vs King Hornet FC Zunheboto @ 2pm.

1979 küm sülen England tetsür team West Indies den Test asayatsü

Yimpoksüi/November 4, 2024 (Agencies): Linük balala den asayamung balala asayatsü asoshi sentong tasen yangluba nung shilem ka ama England tetsür team West Indies den tang mezüngbuba Test asayatsü lir.

West Indies tetsür team 2004 küm nungi tang tashi Test khen danga asaya mali aser parnok England den 2027 küm April aser May ita Test ka, one-day internationals asem aser T20 asem asayatsü lir.

1979 küm sülen team ana ya tang mezüngbuba Test asayatsü asoshi renemogoo.

Cycle tasenba koba 2025 nungi 2029 küm tetenzüklen tashi asütsü, iba mapang England team India, Australia aser South Africa dena Test asayatsü.

Tetsürtem Test tali asayatsü atema ayongzükertem rongnung England captain Heather Knight-a densema lir.

Ano England team taküm asükwa nunga tang asaya aliba

cycle tembangba mapang South Africa aser Australia na den test asayatsü.

Maneni England team 2027 küm mezüngbuba Pakistan nung oa asayatsü. Parnok 2021 küm Pakistan nung asayatsü liasü, saka iba asayamung ya security dak sendakba nung tetsükdaksü adokba ajanga thia liasü.

Mapanglem tasenba nung August ita international cricket masayaba mapang talangka lir aser iba mapang The Hundred asayatsü. Iba ya England & Wales Cricket Board indang tetoktepa ka lir. FTP nung tang mezüngbuba Zimbabwe-a bendenloksemogoo.

West Indies nung 2026 küm Australia den test asayatsü aser parnok 2028 küm South Africa nung oa Test asayatsü.

New Zealand team-bo Test asayatsü atema renema mali. Taoba ita T20 World Cup akokba sülen parnok 2004 küm sülen tang mezüngbuba Test asayatsü akok ta bilema liasü.

BILEMDANGANG

“Tarutsüji ajemalua meranga inyakertem meyong.”